



KOMUNIKADO PA PRENSA

Fecha

21 mart 2013

Account Manager

Jhanirha Anita

Email

jhanirha.anita@gobiernu.cw

Nr.

MINISTER BALBORDA SPLIKA DESISHON TEMPORAL PA KAS DI PÒLVO I TA INVITA NA UN

ATARDI DI INFORMASHON RIBA ALMASENAHE DI PÒLVO.

Willemstad – Siman pasa na un manera prematuro a sali informashon inkorekto riba e lugá ku lo bai warda pòlvo temporalmente. Pa e motibu ei Minister Earl Alborda di Tráfiko, Transporte i Planifikashon Urbano ta informá komunidad via di e komunikado aki i alabes ta invitá tur habitante di Koraalspecht, Dominguito i besindario na un seshon di informashon. E atardi di informashon aki lo tuma lugá djadumingu próksimo di 3.30 di atardi pa 6or di atardi na entrada di transbordador di Selikor na Koraalspecht.

Ya pa basta aña gobièrnu ta konsiente di e nesesidat pa un kas di pòlvo nobo. Pa falta di fondo sinembargo, gobièrnunan di turno, no a logra konstruí un kas di pòlvo nobo. E aksidente di fin di aña pasa a krea e nesesidat agudo pa un solushon pa almasenahe di pòlvo.

E eksploshon di aña pasa a pone gobièrnu dilanti di dos opshon. Sea ta konstruí un kas di pòlvo nobo, òf ta para importashon di produktonan di pòlvo. Gobièrnu manera por maginá, na e momento aki no tin e fondo nan pa konstruí un kas di pòlvo. E otro opshon di para importashon di vürwèrk lo impliká kambio den nos kultura di fin di aña.

Pa e motibunan menshoná, a opta pa buska un solushon temporal pa almasenahe di pòlvo ya ku e situashon aktual kaminda ainda produktonan di pòlvo ta wòrdu warda den kòntainer na Seru di Lora ta sumamente peligroso i inaseptabel.

Internashonalmente tin kálkulonan standardisá ku ta determiná e kantidat di pòlvo ku por almasena den un sierto área. Basa riba e kantidat di pòlvo ku tin na Kòrsou, a determiná ku mester tin un área di 350 meter rondó di e almasenahe di pòlvo ku no ta habitá. Esaki tambe a sirbi komo punto di salida na momento ku a bai evaluá diferente sitio kaminda ku temporalmente lo por almasena pòlvo aki na Kòrsou.

Finalmente a identifiká un sitio ku por ofresé, no 350 meter, sino 500 meter di área no habitá i kaminda no ta un zona di naturalesa konserva. A aserka diferente instansha di gobièrnu ku a duna konseho riba e manera adekuá pa atendé ku e sitio aki. E sitio aki ta un sitio ku no ta alkansabel pa públiko sino ta pa via di e entrada di e transbordadó di Selikor na Koraalspecht.

Djadumingu awor atardi nos lo tin un seshon speshal kaminda lo hiba prensa i



KOMUNIKADO PA PRENSA

Fecha

Account Manager

Email

Nr.

habitantenan di e área ku bus na e sitio pa asina tur hende por tuma nota unda eksaktamente e almasenahe temporal di pòlvo lo bini.

Miéntas ku ta warda e pòlvo riba un base temporal, gobièrnu lo evaluá kon ta atendé ku leinan ku lo hasi posibel pa importadónan di pòlvo mes konstruí un lugá di almasenahe konforme rekerimentunan stipulá dor di gobièrnu.

Pueblo di Kòrsou por sigui tur último desaroyonan di e trabounan di Minister Balborda di Tráfiko, Transporte i Planifikashon Urbano via di su página di facebook ‘Minister VVRP’.